

石琴廬詩集

談國楫署

第四冊



石琴廬詩存卷五

瀋陽張之漢仙舫

菊櫓新草 塵海浮生舟如不繫櫓搖背指又

負黃花回首東籬引吭下里勞歌所彙草爲

新編

起癸亥九
秋迄乙丑

再起

乞身自分老江干
驀地迴瀾蹙上灘
歲月又從鶴攘過
風雲始信蟄居難
故山猿鶴縈孤寢
大陸龍蛇幻百端
心血銷磨還幾許
官書燭影夜廳寒

殘秋公廨夜坐

抱牘人跡晚廨寒印床花拚菊霜乾敲門黃葉聲
疑客擁卷青鐙味豈官槐署公餘攤蠹簡蘆鄉秋
老癯魚竿冠纓幾處方高會竹博花團夜未闌

寒夜公退有作

簿領紛紜夜散曹也如燒盡燭三條春蠶下筆風
簷晚瑣院歸來月正高

豈有蒙茸偃紫貂馬蹏衝雪路星高夜行真訝身
披錦朵朵霜花繡緼袍

鈴柝沈沈月滿城六街寒噤少人行敝車羸馬星

霜裏一路輪蹠軋雪聲

添火齋僮起撥爐壓寒竈婢勸提壺麤官未脫儒
生習濁酒還思讀漢書

悼李生夢陽

臘尾南旋扶病身歸期約及試鐙辰誰知冰雪遼
天路此去真成隔世人

窮途抑塞病初生水泛松花誤北行不慣依人偏

作客寒鐙孤館卧江聲

病起吉
林旅館

病魔纔退引詩魔瘦聳吟肩子夜過一穗昏鐙詩

百韻豈知心血已無多

因苦吟
復病

天賦清才反忌才
茫茫造物意難猜
倚門泣斷雙
慈淚應悔生兒不蠢歎

同硯聯交氣若蘭
趨庭人去豈盟寒
五年一掬西

河淚因汝傷心又一彈

與亡兒述堪
同學最契

上元雜詠

六街添唱麗人行
羣釐香泥半帶冰
一笑花逢雙
姊妹金錢戲擲買春鐙

香車汽笛鼓鳴鼉
人海叢中掣電過
十萬鐙花成

一瞥可容臨去轉秋波

華鐙寶月照釵裙羽衛森嚴娘子軍一喝遊人分
兩壁更誰噓氣敢成雲

一笑天開火樹春千年誰信海揚塵
竭來絳霧紅雲裏都是滄桑歷劫人

捷報崑崙鐵甲寒九華鐙耀萬雕闌
儻教分照流亡屋戰血春來恐未乾

戰火崩城震電驚銀花又見鐵飛鳴
年來大陸龍蛇滿起蟄春雷似此聲

星街巡衛劔冰寒短後西裝馬不鞍官到金吾吾
亦羨不堪回憶漢衣冠

南朝燕子寫吳綾豕貢遼東憲議騰知否文章終
誤國清才雅謎射春鐙

燭龍蟠罷月西行簫鼓沸天月四更更遶鐙山聯
臂去春冰八路踏歌聲

綺年月榭鏤春詞銀箭銅荷髻若絲一縷愁煙今
昔感紅鐙白髮倚闌時

元夕歸故鄉十里河鎮

舊是嬉遊地重來一惘然
鐙花上元夕風月劫餘
天兵燹更塵市村謳雜
管絃滄桑誰健在翦燭
話當年

夜蹋鄉關路泥融半帶冰
歸休猜晝錦來及踏春
鐙秫酒新槽滴蓮輝小
市騰今宵拌盡醉情話
聚親朋

輓關外交署長果忱

心任絲抽斷身非鐵鑄堅
半生才是累五載病爲
緣名盛天終忌文多世
詎傳虞卿書未就誰與
續

遺編

近著俄文集
典未竟而破

道以交鄰重籌憑借箸裁正多用君處忽折出羣
材白髮椿庭淚黃壚絮酒哀風雲莽遼海落落眼
中才

濟南尋詩卷爲吳門楊青士題

明湖十里浴晴嵐驢背吟秋酒半酣
官爲蒞鱸動
躑思濟南山色似江南

年來我亦愛山遊展卷如聞濟水流
便欲借君黑
衛去西風高看鵲華秋

輓孫贊堯上將

一霎長城半壁傾
去年提劍尙鏖兵
靈風徹夜吹
丹旄猶帶榆關戰鼓聲

訓秉慈幃策將勛
吞吳餘憤誓三軍
定知涅背忠
魂在躍馬橫戈擁陣雲

海色天容慘不開
大星落後電音來
松花江上千
軍淚迸入春潮涌將臺

連雲甲第起重闈
官構年年盼石麟
回首華堂誰
主器山邱零落倍傷神

闡揚先德勒鴻文碑錄編成署頌芬他日黑山山
下路墓門誰表故將軍

觀蟻

飽飯立閒階驕陽熾地赤下有螻蟻巢千百出階
隙布陣走長蛇心知勇赴敵別有蟻穴石階西團
團結陣尤整齊似防敵攻取守勢穴門擁土封長
隄此時兩軍距尙遠中有數蟻數往返意必哨探
隊謀報通堠堰否則魯仲連議和戈欲偃須臾大
舉互衝鋒避實擊虛忽背攻轉戰彼軍亦不弱三

進三退如飄風白戰真不持寸鐵口箝足搏生死
決救傷亦有十字軍背負肩舁挖歸穴紛紛輿屍
戰尤烈一軍賈勇肆橫截一軍奔潰捲頽波轍亂
旗靡不成列有蟻獨大必其雄收合殘隊如元戎
捲土重來氣復振兵連禍結將無窮朱輪匿曜陰
雲薄如絲小雨階前落土溼垓心立解圍捲旗閉
壘兩軍各誰遣震震息紛爭保全蟻命天好生安
得一雨徧天下洗淨神州百萬兵

對劍篇

猿公敵一人學之殊不憚重瞳力拔山去學萬人
敵豈知赤帝子斬蛇一劍勦失勢逼烏江憤血劍
邊滴若爲沐猴若爲龍劉項興亡一劍中子弟八
千戰非罪骷髏百萬將成功至今神州飛戰血戡
亂真人何時逢凜凜霜鋒照肝膽低頭合拜古英
雄

紀夢

杖策海上來遙見二龍鬪
猙威挾風霆毒霧昏白
晝火雲齊翻飛敗甲百里生靈劫
灰骸歸翦秋鐙

話不平壁劔長鳴迸出匣鎧昏壁破劔重把當今
誰是屠龍者銅駝泣後銅馬爭十載狼烽徧九夏
兵連蠻觸亂方長魂弔蟲沙淚空灑天心悔禍定
何時坐看玄黃血盈野我方搔首劔無聲恠風吹
雨響屋瓦

菜圃

我有一菜圃約略大一畝一半種瓜豆一半種葱
韭隙地闢花畦編籬插疏柳夏雨豆莢肥摘以醢
邨酒秋菊金錢花對之度重九吏無租可催詩成

已一首此樂少人知饒舌來鄰叟蘭成賦小園心
憂兵戈久君圍將毋同余則曰否否

閱曾述堂詩集有懷即柬

銀岡離緒夜鐙知爲念騷人讀楚詞北海但思長
得酒南豐錯恨不能詩讓君獨步千秋業與我同
愁兩鬢絲明日重陽應盡醉四山黃葉倚樓時

山海關

北連山作障東竟海爲關何與興亡事頻聞攻守
間金遼早深入秦漢幾生還將略銷磨盡千秋戰

血殷

昔是爭衡地今當用武秋
海山飛血肉遼冀扼咽
喉島倚秦皇險祠生姜
女愁青燐聞夜哭豈是古
骷髏

重關雄百二第一此巍峩
高控三韓地橫吞大海
波將才全瓦少戰血背城
多險扼橫磨劍燕雲竟
若何

題尙慧忱東遊草

當年持節下滄溟縹緲蓬
山一髮青三日醉吟濤

雪裏海門東去穩揚舲

扶桑浴日水環流萬里風颿一葉浮
指點仙鬟山十二碧痕如畫海天秋

香山詩價雞林重玉局文名海外崇
配與先生成鼎峙朗吟飛過大瀛東

卷裏天風掠袖寒星帆拂曉捲廻瀾
詩成笑傲滄洲遠三島如拳回首看

題碣石觀海圖

咫尺麟洲落眼前天風吹上鶴翩翩
滄溟萬里如

杯底直視齊州九點煙

碣石濤飛白日寒
釣綸鰲吸欲投竿
羨門聞有屠龍劍
相約騎鯨一借看

魚龍出沒望中收
弱水迴瀾更北流
欲到樊桐謁天帝
白雲明滅絳宮秋

宅畔老榆爲秋風所折詩以紀之

牆角老榆鬱古色
縱橫竟畝影四塞
虬榦輪囷經雪霜
分枝還庇西鄰宅
三春雨灑簸錢堂
九夏陰垂眠琴席
有時就樹讀我書
濃翠溼衣痕不滅
鷦

地秋風捲樹來一枝旋被風吹折
枝折風奈老榆何靈根百尺搖
不得喜翦繁陰一隙開宵來便
我看明月平聲

題雪庵逸叅崇仲山臨安山色圖卷

白首馮唐老部郎畫叉粉本閱滄桑
自從點就蒼山色烽火臨安幾戰場

尺山寸樹仿畊煙劫厯華嚴感墨緣
回首庾樓風月夕一鐙同證畫中禪

今歲春寒最久交夏始花窺園漫成

歷將秋肅閱冬藏
韜斂菁華過豔陽
共道南榮花
事好幾人回憶舊風霜

大地春回雪未消
年年寂寞過花朝
如何已餞東
君駕銀杏初開一兩梢

江浦陳亮伯先生遊濱江道瀋水過訪留飲
索拙集以去越日評隲寄還賦此答謝

元龍今再見
白首欲何之
老作諸侯客
高吟出塞
詩望門訪張儉
把琖對袁絲
潔珊同座
應爲憐同調
深

杯醉不辭

感我饒真氣逢君媿小巫劫餘詩草在老去筆花
枯繩幸宗工引輪憑大雅扶豈惟師一字十斛擬
量珠

寄懷陳亮伯濱江

寬袍長劍客諸侯桑海浮名等幻漚傷亂杜陵頻
出塞思跡王祭獨登樓寢懸江浦家何在詩入遼
天氣倍道我亦耽吟感遲暮春風相憶雪盈頭
吟徧松花江上春達官不作作詩人心輕萬里常
爲客手擲千金豈諱貧大漠鷗盤同浪迹中原龍

戰早抽身竭來憑弔金源路石弩銅鞮辨劫塵

艾繩

傾筐呼艾艾入軸引繩繩炷夜蘭熏瓣懸空樹挂
藤星分藜杖火煙繚草堂鐙看到長河轉香心燼
未曾

結繩希太古簪艾過端陽素手綯成索丹心炯自
芳火分螢尾小草縮蛇身長何處蟲雷聚清眠夢
亦香

蒲扇

瞻蒲課農子製扇便田翁示辱無鞭及遮陽有笠
功菰塘思戰雨瓜架坐搖風隨手牛蟲拂攜過犢
柵東

偷得宮紈式編蒲巧製將何須花續采真藉草迎
涼水織千波細風搖九節香遮眠北窗卧煙雨寢

鷗鄉

藕香榭夜坐遲雪庵老友不至

待月藪荷裏招涼曲榭旁花如噓有氣風盡化爲
香近水秋先覺懷人夜未央停雲頻矯首冷露滴

蓮房

出巡水田見白鷺

一鷺翩然起溪流正拍田白翻雙翅雪青巾四圍
天皎皎明秋水寥寥破夕煙江湖遍羅網羨爾獨
超然

悼李生藏村 余於生夙不知名一日深秋

投詩求見因座有他客留其詩約明日來
越日不果來又數日聞其已逝不勝愕悵

詩以悼之

不關情處倍情深袖裏新詩覓賞音我自憐才生
短命縱非相識也傷心

遺編入手忍重開一面緣慳劇可哀回首秋風剛

幾日打頭黃葉送詩來

生詩有黃葉飛來亂打頭之句

風騷接武及春青幾輩清才折妙齡豈獨飄零詩
老盡詞壇後起亦晨星

弔罷懷星歲一更

李夢陽字懷星青年能詩去歲卒

無端又說玉

樓成豈從長吉開先例作記偏來召李生

九秋遊東陵感賦

不蹋城東路風霜已十年重來龍蟄地憑弔雁來
天享殿隆恩峙豐碑聖武鑄唐陵與晉隧何處問
寒煙

半山橫紫翠一路入煙霞北地秋將老東陵日又
斜銅駝悲奕葉石馬繡苔花不禁滄桑感河聲走
岸沙

萬松寒不語誰與話興亡冷黛排天柱秋花薦野
香沛宮金爵冷遼海玉魚藏誰下亭林拜騎驢過
石坊

王迹遼東熄崇陵此又經
榦龍接長白山鬼哭冬
青遺廟留三箭幽宮護
百靈大風歌久歇松柏
晝冥冥

暮春野溪散步

野花香不斷緩步向溪橋
蜨路低相引鶯巢坐見
招同流蘋各蔓分岸柳
通梢前渡添新漲跡牛
半沒腰

秋夜赴大連灣車中作

連灣七百里襍被上飛輪
本是遠遊客翻安高卧

身帷鐙懸照夢窗月走窺人
癡裏千山過邨雞遠
報晨

車中曉望

飛輪載夢壯南遊
破曉車停野站頭
紅日半竿城一角
海雲開處見金州

輾輾征輪石路斜
深山深處幾人家
窺窗一白渾疑雪
涼散秋原蕎麥花

田家秋曉車行山路望中作

朝陽射屋角
明滅晃炊煙
新秫初開甌
秋禾半在

田助農資蠢婦託命倚烏犍
吾有跡畊願蹉跎又
幾年

抵大連灣

浮空煙萬縷到站日三竿
市面方音雜關頭海氣

寒青泥迷舊蹟

原名青泥窪

黃渤折迴瀾筦鑰今誰屬

繇華倦眼看

此地龍蛇混當年鵲蚌爭
鵲巢鳩占據馬路蟒縱
橫帆影排雲上車聲掣電
行虎灘風浪激猶作不

平鳴

遊老虎灘

三面山圍海一涯銀濤潑眼此停車侉年合續南
遊紀老虎灘頭看浪花

番樓櫛比酒帘青狎浪漁舫散若星不見魚蝦開
小市吹人真訝虎風腥

明滅斜陽泛紫瀾霞翻石壁浴成丹六鼇儻許垂
綸下定有珊瑚拂釣竿

側身東望海橫流石激灘鳴虎氣咻安得北平飛
將在弓開猿臂射濤頭

銅柱銷沈定幾年
迴瀾空潑打魚船
流連不盡茫茫感
更上山樓望海天

龍口遙遙對峽懸

山東海埠

遠東形勝峙天然
雄風表

海今何似望斷齊州九點煙

石琴廬詩存卷六

瀋陽張之漢仙舫

晚晴集

余於四時愛初秋於一日愛夕陽或

曰夕陽暮矣奚愛爲顧不聞天意憐幽草人

間重晚晴乎掇輯週甲以後詩命曰晚晴誠

重之也

起丙寅迄戊辰

初春同鍊隍潔珊赴城北訪王惕庵故里

出城如脫甕斗覺碧天寬野雪消都盡春風拂薄

寒山容迎去馬邨影隔飛翰便道尋蘭若

二臺子村古寺

豐碑剔蘚看

負郭春將半聯車興不孤雲橫法輪寺冰泮柳條
湖地名邨僻驚生客途長問僕夫故人家近遠可似

輞川圖

初秋

躑躅炎塵裏新涼乍浣襟迂無諧俗韻老有愛秋
心畫境山平遠詩懷月古今夜來天似水散髮一
長吟

夕陽

亦解黃昏近晴光故故延天心調晚霽人意惜中

年花隴閒情戀簾鉤側影穿雲西鴉數點畫補水
邨邊

壽馬騰溪中將

學書學劍請纓年投筆來看塞外天揮手燕然碑
勒後大英雄即小神仙

鴨江坐鎮倚瑤戈橫海功高馬伏波共道斯翁猶
矍鑠東南銅柱近如何

摩厓椽筆勒題銘脫腕龍蛇護百靈無量誰爭金

石壽千秋名並鳳山青

鳳凰山有公摩厓書

兜鍪老將重幽燕百戰功成雪滿巔猶有填胷兵
十萬引年願賦寶刀篇

楊令弟女士重來遼東述其遭際感賦即贈
簪花詠絮擅清才遼海曾看畫本開瑯瑤一身雲
萬變又攜綵筆出關來

烽火關河行路難飄然裙珮到三韓若非橐有荆
關筆安得遼山兩度看

曾入坤甯侍太妃才名幾載動宮闈自從內府窺
珍祕畫境真經五嶽歸

百年慧業繼南樓誰道名家不女流
海內佻年增畫史閨門一席自千秋

無端風雨撼宮槐鳳泊鸞飄劇可哀
誰識鷓鴣寥落意一枝曾住上林來

湖園水殿寫觚稜又賦東都弔二陵
照夜欲圖雙白馬遼天風雨入秋鐙

粹山雅集 丙寅五月廿四日同于雲章劉

海泉袁潔珊赴日站粹山館泉清林蔚別

有一天尊酒流連紀以四律

誰憑丘壑意別構小蓬瀛妙手三山幻秋心五月
生花深聞鶴唳松小學龍聲尊酒資瀟灑虛堂萬
慮清

天疑闢兜率館合署璣瓏有暈皆空翠無塵著輭
紅玉涵平沼水珠散落泉風圖續西園集侂年證
雪鴻

鼎沸神州日尊開別館風居然來世外何必計囊
中酒捧雙紅袖泉飛萬綠叢醉翁年莫問四皓首

應同

日妓揣余四人
年歲高下故云

落落劉公戩錚錚于北溟袁咸推海容張喜遇詩
舫偶爾聯今雨非關聚德星浮生萍偶合長憶粹
山青

同雲章潔珊赴金州訪岷源破曉抵站口占
鐵龕高卧處深院長莓苔豈道晨曦閃相偕舊雨
來車鐙池電閉城闕海雲開良覩知非遠徐行下
站臺

和澹堪九秋出山海關東張白翔原韻

載寢飛輪破睡甜九秋霜壓路塵炎窺邊萬馬空

成捷戰野羣龍未官潛山杏林荒邨火斷關榆葉
落海風嚴四年重覩巫閭面坐對吟窗一捻髯

北陵雅集 丙寅重九澹甚至自京師仁甫

潔珊亦適在奉吳君灌依因加約同人雅
集北陵維時宿靄初收霜林如畫諸君咸
有吟篇余亦草成斷句

不堪遼海說龍興詩賦重陽劈剡藤誰是吟秋傅
青主霜紅題徧十三陵

昭陵石馬卧荒煙紅葉題詩十載前
丙辰九秋曾與洛笙海泉

遊此賦詩有沍霜
紅葉豔於花之句
萬劫秋容終不改
鷄楓烏柏自
年年

爲澹堪作十三古槐館圖并題

松花江上客小隱住京華
馬市橋邊路烏衣巷口
沙種瓜欣得地因樹便爲家
尺五天非遠宮槐冷
暮鴉

輓顧君用臧

養士遍天下如君曾幾人

君出身留日
武備學生

有家居兩

粵無黨附三民珠海獨行傳
銀鐙九死身十年鐘

虞淚化碧血猶新

轍鮒甘薇蕨宮駝痛棘榛西山窮有例北海病無

鄰遺恨丹陽壘招魂析木津節庵逢地下故國話

悲辛

辛亥秋君守鎮江礮臺帛書梁節庵弟子顧臧屍纏諸身臺破革軍知不可降囚尋釋之

晉陽田公子琮爲國事來奉別筵留詩步韻

和贈

相逢遼海暫盤桓一瀉詞源四座歡三晉文章今
鳳起二陵風雨昔龍蟠邊聲動地驪歌促兵氣衝
天鴈陣寒西北櫓槍猶閃耀竭來何日定安瀾

得楊令弟女士橫濱書言即轉航美洲草成

即答

海風吹到薛濤殘身抵扶桑便是仙何事揚舲更
東渡三神山外一帆懸

才名直欲遍瀛寰綵筆篷窗架紫珊海汐天風十
萬里飛航來畫舊金山

陳介卿司令先祖旌表孝子公入祠徵詩敬

題

歷盡冰霜負米時百年潛德有誰知欲徵東國畸

人傳重補南陔孝子詩家範栝捲承祖蔭國材楨
榦挺孫枝崇祠肅拜淪胥日願爲綱常進一卮

呂邨鋤園圖爲袁潔珊德配蘇恭人題 潔

珊家本中貲經亂中落析箸後無一椽一

隴之資時方有事地方不遑內顧恭人乃

攜子女轉徙呂坊寺邨託荒園數畝以居

井臼耰鋤一身百役不以生計累夫子潔

珊落落亦遂不以貧介意專壹志慮於國

於民功在鄉邦名滿寰宇家貧健婦良可

思已恭人現逾五旬履豐思約乃倩畫史
孫玉泉爲寫斯圖蓋亦不忘在莒之意焉
爰敘概略綴以俚詞

畫苑翻新格閨門無逸圖不忘身在莒真比志吞
吳破釜甘茹苦編籬自種蔬錙銖權致富今見女
陶朱

丈夫懷遠大國瘦官肥家原憲貧非病黔婁嫁未
差添薪槐落葉促織豆開花過午籬邊坐鷓鋤日
影斜

海棠貯金屋可比菜花香春翦韭充饌秋收芋作
糧鷄豚分別柵蜂蜨過鄰牆紅紫徒妖冶由來薄
衆芳

典衣助脩脯

少遭家難廢學內子典質衣釵乃得復出就傅

余亦念糟糠

以彼姬姜瘁何如德耀强瓜壺甘旨蓄荆布即華
妝寫照貽孫子清風菜甲香

晚過千金寨

車隨山路轉飛電萬鎗來墟日沈將暝窰煙鬱不
開忍誇金穴富坐見陸沈灾大堀陵爲谷虛風生

站臺

夜赴撫順城

霜月撫城路肩輿數里遙
身敲經仄阪股栗渡危橋
小市疏燈閃嚴更警鐸搖
到門迎父老問俗話良宵

得姚生延熹安東旅行詩倚韻寄答

鴨江秋色妙於詩憶我前遊九月時
馬轉紫金山路狹干林黃葉拂鞭絲

花生五色江郎筆蘭撥雙橈商女舟
漫吐錦心嘯

煙月江風吹入四絃秋

元夕再回故鄉感賦

又踏春鐙返故閭
滄桑過眼景原殊
華筵做月呼紅友
敝帚迎神拜紫姑
民氣漸蘇兵燹後
鄉風猶憶我生初
柘枝社鼓椒花酒
一種雍熙恐不如

和澹堪題偶齋詩集後元韻 偶齋宗至寶

公竹坡廷別字也公於清季以天潢貴胄
忱念宗社連上諫疏極論朝政同列側目
遂有福建督學之命浮沉海嶠比之屈子

湘纍放浪煙花甘於信陵醇酒及納江山
船女自効落職詩酒送日晚益無聊病卧
抱關老兵之廬以歿亦可傷已澹堪之詩

曰諫疏回天竟未能衰朝無計望重興生
當華胄偏如丐死愛名山合是僧病後橫
陳同嚼蠟老來分韻每呼鐙英雄末路多
醇酒豈獨人才惜信陵論公者惜其才悲
其遇從未有揭其忠憤者得澹堪此詩而
公之心乃大白於天下後世並聞澹堪述

公末路甚悉悽然有動於中步韻以致憑

弔

宗社關懷忘豈能熙豐黨論慨朋興劫餘朝局悲
如戲懺後情緣悔不僧文曲一官甘敝屣離騷三
復賸孤鐙年年墓草青寒食誰酌蘭泉奠杜陵

瀛島感舊

不踏帝京塵於今十八載挾策叩金門曾得覽瀛

海

庚戌朝考
因遊三海

瓊島水清淺琳宮地爽塏典門老宮

監延坐領禿顏自云際貞元翠華幸臨每兩宮龍

上賓輦路荒誰灑水殿與雲廊寂閉凋壯綵淒此

件獸環河清容可待

宮監某典守瓊島各殿追話兩宮慨如白頭說宣宗也

風雲變無端朝市忽已改西望憶京華關河阻鋌

鎧茲來步金鰲

橋

目觸心為駭遊人爭渡喧酒市

呼朋索太液豈人間論園夏可買當年瓊華島良

石猶磔魄御碣巍然存大書仰宸楷

御書瓊島春陰勒石尚在

拾級陟層巔八表昏無彩白堦上干霄似欲訴真

宰鼎沸遍神州天意詎可解言尋老宮監飄零久

不在徬徨誰與語空際風鈴擺

丁卯浴佛日敬宜約同照巖潔珊瀛澄往遊西

山攜酒榼乘籃輿遍歷諸勝各紀以詩

靈光寺

袖挹西山爽回頭卅五霜樓登舊明遠

甲午秋闈登明遠樓

望西山有詩

寺叩古靈光斷塏迷元覺

庚子塏為外兵礮毀遺址僅存

連峰折太行薊門青不改何物是滄桑

潛廬

敬宜別墅在靈光佳處

勝日宜攜榼何年此結廬池魚潛避釣

池多赤鯉異種也

山鳥勸提壺林雨呼鳩婦花風颺鼠姑主人能醉

客煖酒借僧廚

大悲殿

以竹得名青玉萬竿塞蔽階宇

齒屐千峰轉肩輿一徑懸
蟠空松不地入寺竹爲
天普照佛光綠坐談僧語
玄蒲團如可借玉版共

叅禪

香界寺

由大悲深入高踞崇巔中多宸翰曾駐翠華

又撥煙霞去看山豈厭深會窮丹嶂頂一豁白雲
心花雨飛宸翰天風度梵音置身高不覺下視萬
峰沈

欲往寶珠洞天晚不果歸路訪翠花公主墓
雲迷寶珠洞日下翠華峰山好行難盡墳遙問莫
從帶蘿山鬼語穿竹野僧逢指點埋香處煙嵐莽
萬重

自香界返靈光路間作

生平幾兩屐薄暮一聲鐘苔印來時路松標轉處
峰懸輿高度鳥法鉢晚歸龍雲外佛鐙閃禪關知
未封

鳥同人競道僧待我支筇相見問遊興曾穿巒幾

重殘陽鴉背斂晚翠佛頭濃題壁呼鐙寫佗年證
雪鴻

重到慈慧寺悼達通和尚

京華千里昔擔簦琴劍棲遲伴老僧半榻經聲塵
外枕廿年書味佛前鐙蒲團坐破人何在芋火燒
殘我到曾空憶敲門歸月下霜風瘦倚一枝藤

爲達通建塔落成詩以紀之

人海幻滄桑佛天亦如此慈慧古叢林初始明司
禮明司禮監
建爲公廡星霜幾廢興浩劫庚子始達通苦行

僧誓佛興舊址縛帚瓦礫場托鉢功德水爲山無
簣虧佛光煥然起己酉貢明堂金門召試士千里
來神京行李焉投止竹院偶逢僧慨然假牀几夜
讀佛龕鐙朝餐香積米誰俗更誰僧渾然無此彼
時復就余話云惟君知己莊嚴佛功成垂垂吾老
矣涅槃會有時無塔骨何委身後難自謀歛歛動
移晷維時余壯年自度當後死此事已心許但未
露頰齒人佛共滄桑所云豈無以主僧忽已亡慈
慧運復否衣鉢起訟端數年猶未已墓草宿已蕪

河清甯可俟特地來京華鳩工集蒿里

卒時草葬
永定門外

平除土一杯層疊甃石壘所期久彌堅非徒爲觀
美鐫石手題銘塔級巋然峙佛證去來因儒主忠
信旨甯以死生歧昧此靈臺理千秋挂劍心高風
孰與比抗懷思古人延陵吳季子

與澹堪冒雨同車訪日僑種樹者

一路水雲流車箱穩似舟雨師消野馬海客訪閒
鷗妙術春生手幽居屋打頭老妻兼婢事蹀躞進
茶甌

眠雲同鶴嬾種樹愛蚪蟠言訪橐駝宅經過鬪鴨
闌鄉雲三島遠花雨一庭寒願借哦松術龍鱗老
眼看

著書傳種樹負郭此移家門到隨車雨窗探入座
花經綸一丘壑咳唾半烟霞豫訂尋松約秋山石
徑斜

重訪澹堪寓廬先日已返京矣悵然賦寄

偶託遼海蹤樂比商山逸觀奕我曾來二老同一

橘

主魁
星公

三日不見君鄙吝發舊疾同訪種松人別

來又幾日相契兩忘形時來一促膝飄然雲鶴蹤
所向竟莫悉老僕出應門云已返京邑千里問歸
期遲早殊難必傷亂念杜陵羈棲無定域羨鹿吳
江帆銅駝晉宮棘渺渺釣遊區榆廬松江北豈不
念鄉雲有家歸不得伊古棲隱傳山深與林密山
林闢戰場抱影復焉息十年風鶴心一舉雪鴻翼
遼海盼歸來北陵看秋色

題松齋主人吳灌依蒔花種菜圖

茫茫八表慨同昏種菜端合早閉門何日尋君籬

落下芒屨蹋破碧苔痕

江湖無地著魚竿

甲辰送友詩

舊句因君重詠歎試問

一鋤花雨外橫流何處是安瀾

今古神州歎陸沈仙源世外豈堪尋松齋圖畫蘭

成賦遼北江南共此心

寫照徵題我亦曾一窗蕉雨坐秋鐙

余秋鐙坐雨小照玉泉寫

澹堪題蕭寥分索圖中味君半農夫我半僧

一任人呼賣菜傭長鑿大笠野田風英雄亂世工

韜晦豈在紛紛冠劍中

三分俠氣七分儒誰識虬髯烈丈夫

吳盛髭髯

我欲重

緋紅拂傳爲君添畫美人圖

裴公綠野謝公墩花木平泉蹟尙存
遼海佗年添故事吳園仿古倒吟尊

鐵龕訃至乘輪往弔途長夜永車中感成

鵬鳥悲鳴鎮可驚鋒車載夢此南行
分明輪軌前遊路碾作酸風苦雨聲

蘇門嘯斷涕橫流

孫鼎公前卒

又感人琴弔子猷一夜

飛輪七百里載將熱淚到金州

題鐵龕遺照

金州之金鐵山鐵鴻鈞大冶鑄奇傑馭世指腕出
風雷照人肝膽貯冰雪回憶文壇識面初機雲入
洛才名殊延平一劍化龍去干將孤舉驚風胡摩
盪風雲金百鍊功成長揖歸羽倦我來南海弔人
琴影堂猶見如生面浩氣精光迥不磨誰道浮生
若癡過佗日黃金鑄范蠡長留儀表壯山河

夜宿湯岡站玉泉館紀事

午發金州城暮抵湯泉驛馬路電珠開頗可辨行

迹廣陌夾寒林凍柯森列戟四山雪未消冷氣生
虛白池館兩三家遙辨玉泉額入門拂征塵先解
雙鳧舄登樓拾丹梯入室布錦席食榼供芳鮮茗
甌捧澄碧鉢罷更浴衣服之殊無斲身披范叔袍
足躡阮孚屐湯池甃石成其廓圓如璧下與地泉
通陽燧蒸流液但見水滢滢莫測通泉隙清可濯
吾足漸浸及腰脊淋如落湯鷄滑比脫網鯽一事
信將疑謂能醫攣臂坐浴跛者流行去足仍躡除
痼縱無憑潔垢殊有益拂拭歸卧房清風生兩腋

一枕夢華胥今夕知何夕

四友詠 四友者生不一地學不同庠奚以

友友於鄉邦之多難也多難既不克自逸
輒起而爲頭目之捍衛而形迹因以合焉
合斯友矣亂靡有定友且久矣顧亂之初
生四友咸在盛年曾幾何時而沒者草宿
存亦華顛前顧茫茫不禁人壽河清之感
爰綴短詠聊存幾微非以存四友也而廿
年來鄉邦之故有與之俱存者矣

山甫剛柔度希文憂樂忱鄉邦無限事風雨九原
心鼎

袞鉞輕身外風雷脫腕間出爲張太岳歸亦謝東
山鍊

呂端明大事王猛擅雄才善養浩然氣盤空獨往
來傭

阮籍雙眸子髯蘇一肚皮輸君心似髮贏得鬢如
絲石

戊辰新春曾子敬寄示濱江度歲五十七自

詠詩索和疊韻二首

春鐙臘鼓歲華遷
瀋水濱江各一天
兩地同愁惟短鬢
一生難卸是吟肩
能詩喜讀南豐句
招隱聊賡北郭篇
人海彭殤何足問
雲衣蒼狗且隨緣
漫擷湘蘭怨
謫遷梅花春信入
冰天星霜一抹悲
銀鬢道義雙擔仗
鐵肩悔我誤吞丹
篆字酬君欲賦寶
刀篇雄心自有千秋在
燁燁勛名鏡裏緣

人當鋪謠

今之當鋪古質庫
匪巢假之仍曰鋪
不質釵釧不

衣袴專以質人爲業務出張遍北省最大抱犢崗

在山東臨城勒火車

中外人票百名者軍器不當招牌爲記此當招

牌專恃軍器不設通都不設大邑兇山惡谷深以
閱四出勒票專厚利當票執一紙此票縛兩臂當
票存民家此票匪巢寄票之代價百萬議錢到許
贖公平交易定期不誤嚴於軍紀逾期錢不來捨
票置死地嗚呼票捨家不知傾囊破產猶措資血
汗金錢送虎口臨行還載死票屍

勞勞歌

勞勞歌歌田叟牛力畊銜勒口鼠竊穀叟知否叟
曰負耒牛力朽爭及五技鼠都有吁嗟鼠兮將驅
爾東南畝

勞勞歌歌僕御馬絕塵鞭捶怒兔忘蹄僕何誤僕
曰伏櫪馬齒暮爭及三窟兔善顧吁嗟兔兮將策
爾關山路

勞勞歌歌告汝鼠飲河止滿肚兔舂藥乃一杵任
重致遠豈其伍惟有牛馬知報主

題胡窰少章百梅圖

蠶叢路斷虎磨牙
萬里鄉雲癭浣花
湘管一枝年七十
滿腔冰雪走天涯

鄧林粉本出天然
曾上西湖放鶴船
恠底筆翻香雪海
孤山深處住經年

夢遊西湖
至輒經歲

自題秋鐙坐雨圖古裝小像

石火光土苴名老來面目
尙書生青鐙不改兒時味
擁卷秋窗聽雨聲

三生慧業古雲煙
道服儒巾石上緣
將勿前身洪

谷子一鐙坐領畫中禪

余生乳齒即癡於畫宿根
已昧莫證前因歲庚子遇

術者能於光中窺人宿世法翦素紙如月書
叩者生辰反黏壁間少焉光生即有所見見
余爲古巖處之士衣冠岸異大硯盈尺畫卷
前橫拈筆凝視欲下光亦遂斂事誠幻矣然
五蘊三因何非癡幻安知三生石
上不在此一霎光中耶後詩及之

石琴廬詩稿卷末

後序

析津郭歎岑明府進修

詩與畫通古人詩畫兼長者首推王摩詰同時如大小李郭河陽許道寧輩工彼絀此視輞川有遜色矣宋人詩畫兼擅推蘇文忠同時文湖州李伯時米海岳如星之拱衛如驂之雁行元末趙松雪王叔明倪雲林強半詩爲畫揜世皆賞其畫而傳其詩者絕少明之作者如石田衡山玄宰三家皆

有專集行世而能頌其全集者無幾人有清一代
石谷畫聖不工詩南田能詩殊不多作兼之者前
推梅村麓臺後惟錢籜石董氏喬梓中葉以後船
山板橋遊戲筆墨不得謂之專家近人如錢松壺
戴醇士文人染翰固自不同流俗耳說者謂畫無
聲詩也詩有聲畫也工詩不工畫世多有之工畫
不工詩其畫不爲完美下走具此識以相天下士
古今兼之者殆罕丙午渡遼後初與邦人賢士大
夫相結納聞石琴廬之名未獲一接聲歎洎己酉

庚戌間共事諮議局籌備處見君衷懷沖澹不爲
崖岸高峻之行亦不爲翕翕熱交態於友好處觀
君畫筆超然私心旌異國變後自營川投効結鄰
而居者七八載兩家子弟書聲互應答暇時過從
頗密始讀君石琴廬詩此外未付刊者多如束筍
未遑卒業也嘗浼君繪秋鐙補讀圖欣然命筆每
一畫成輒遣价持示欣賞焉君嘗囑余撰遼海畫
禪傳以人事僛促未暇屬辭至今耿耿上年君輯
詩存詩賸二編成函集囑下走校閱讀訖作而言

曰前人論詩不外格調性靈互爲消長尊格調者
訾性靈爲俚俗主性靈者詆格調爲迂拘不知古
今名篇雋句其造端也莫不本性靈始其成就也
莫不以格調終君之詩處處發自性靈至其琢句
成篇風趣獨絕而格調按之古人罔不章妥而句
適世之未見君畫者讀君詩可以得其大凡焉集
成爰誌我二人訂交始末以諗當世慕君畫者讀
君詩亦可以無憾焉爾